

HALOS ANG TANANG GRUPO MOINGON NGA ANG ILANG PUNDOK MAOY INSAKTO UG SILA RA KONO ANG MALUWAS. ANG AKONG PANGUTANA MAO KINI: SA UNSA MAN GAYOD NGA PAAGI NGA ANG TAWO MALUWAS?

Atong himnumduman nga ang Dios gusto gayod siya nga ang tanang tawo maluwas. Mao nga mabasa gayod nimo sa Biblia nga ang Dios nagsutli gayod kanato nga sa unsang paagi giluwat sa Dios ang mga tawo ug sa unsang paagi maluwas ang tawo. Ang Dios naghatag gayod kanatog paagi aron kita maluwas. Wala siya magkulang kon kaluwasan ang hisgutan. Kay mao man kini ang gusto sa Dios alang sa mga tawo. Gani gusto man ang Dios nga ang tanang tawo maluwas. Dili siya gusto nga may usa nga malaglag. Gusto siya nga ang tanan mahibalo sa kamatuoran aron maluwas.

1 Timoteo 2:4(AB) "Nga nagatinguha nga ang tanang mga tawo mangaluwas unta ug managpakakab-ot sa kahibalo sa kamatuoran."

1 Timoteo 2:4(MBB) "Buot sa Dios nga maluwas ang tanang tawo ug mahibalo sa kamatuoran." Kini nga bersikulo dayag kaayo nga nagpasabot kanato nga gusto gayod sa Dios nga ang tanang tawo maluwas ug mahibalo sa kamatuoran. Ang pag-ingon nga **"mahibalo sa kamatuoran"** kini nagpasabot nga kinahanglan nga ang tawo mahibalo sa paagi giunsa pagluwas sa Dios ang mga tawo ug sa unsang paagi maluwas ang tawo. Mao nga ang Dios naghatag kanato sa iyang mga pulong nga anaa sa Biblia aron mahibalo kita sa kamatuoran kon sa unsang paagi nga giluwat kita sa Dios.

2 Pedro 3:9(MBB) "Ang Ginoo dili maglangan pagtuman sa iyang gisaad sumala sa gihunahuna sa uban. Apan siya nagpailob kaninyo kay dili siya buot nga may usa nga malaglag kondili nga ang tanan maghinulsol ug mobiya sa ilang mga sala."

Kini nagpasabot nga buot gayod sa Dios nga maluwas ang tanang tawo, dili siya gusto nga may usa nga malaglag o masilotan kondili nga ang tanan mahibalo sa kamatuoran ug mobiya sa ilang mga sala. Kay gusto man gayod sa Dios nga ang mga tawo maluwas mao nga naghatag gayod ang Dios ug paagi nga maluwas ang tawo. Mabasa gayod nato sa Biblia nga sa unsang paagi giluwat sa Dios ang mga tawo. Wala gayod magkulang ang Dios kon paagi sa kaluwasan ang hisgutan. Wala gayod magkulang ang pulong sa Dios sa pagpasabot kanato kon sa unsang paagi nga maluwas ang tawo. Mao nga ang Dios naghatag kanato sa iyang mga pulong nga anaa sa Biblia aron mahibalo kita sa kamatuoran kon sa unsang paagi nga giluwat kita sa Dios.

Tito 3:5(MBB) "Kita iyang giluwat dili tungod sa maayo nga atong nabuhat, kondili tungod sa iyang kaluoy pinaagi sa paghugas nga gihimo sa Espiritu Santo aron kita makabaton ug bag-ong kinabuhi."

Tito 3:5(AB) "Kita iyang giluwat, dili tungod sa mga binuhatan nga nahimo nato sa atong pagkamatarung, kondili tungod sa iyang kaluoy, pinaagi sa paghugas sa pagkatawo pag-usab, ug sa pagkabag-o diha sa Espiritu Santo."

Ang unang bahin sa maong bersikulo nag-ingon **"Kita iyang giluwat dili tungod sa maayo nga atong nabuhat, kondili tungod sa iyang kaluoy..."** Kini nagpasabot kanato nga ang mga magtotoo kang Cristo o mga Cristohanon wala sila maluwas tungod kay mga maayong tawo sila kondili nakabaton silag kaluwasan tungod kay gikaluy-an sila sa Dios. Ang kausaban sa kinabuhi ebedensya lang sa ilang kaluwasan. Dili kay maoy nakaluwas kanila. Mao nga miingon ang bersikulo **"Kita iyang giluwat dili tungod sa maayo nga atong nabuhat, kondili tungod sa iyang kaluoy pinaagi sa paghugas nga gihimo sa Espiritu Santo aron kita makabaton ug bag-ong kinabuhi."** Kini nagpasabot nga sa dihang madawat nimo ang kaluoy sa Dios tabangan ka ug hugasan ka pinaagi sa Espiritu Santo aron makabaton kanag bag-ong kinabuhi o kausaban sa kinabuhi. Busa, una sa tanan, kinahanglan nga dawaton nato ang kaluoy sa Dios. Nan, kinsa man kining gikaluy sa Dios? Kinsa man kining kaluoy sa Dios? Sumala sa Biblia ang gihatag sa Dios timaan nga kita iyang gikaluy-an mao si Cristo. Siya ang kaluoy sa Dios. Kinahanglan nga dawaton nato ang kaluoy sa Dios nga mao si Cristo aron makabaton kitag kaluwasan.

Ang BIBLIA May Tubag

2 Corinto 6:2(ABMBB) “Kay nag-ingon ang Dios, ‘Gidungog ko kamo sa takna nga akong gikahimut-an, ug gitabangan ko kamo sa adlaw sa kaluwasan.’ Mao na kini ang takna sa pagdawat sa kaluoy sa Dios. Karon mao ang adlaw sa kaluwasan!”

Ang kataposang bahin sa maong bersikulo nag-ingon “**Mao na kini ang takna sa pagdawat sa kaluoy sa Dios. Karon mao ang adlaw sa kaluwasan!**” Ang pag-ingon “**Mao na kini ang takna sa pagdawat sa kaluoy sa Dios.**” Kini nagpasabot nga karon ang takna nga modawat kita kang Jesus nga maoy atong Manluluwas. Kay si Jesus mao man ang timaan nga kita gikaluy-an sa Dios. Sa dihang modawat kita kang Jesus nga maoy atong Manluluwas gidawat nato ang kaluoy sa Dios. Mao nga miingon ang bersikulo “**Mao na kini ang takna sa pagdawat sa kaluoy sa Dios. Karon mao ang adlaw sa kaluwasan!**” Karon nga buhi pa kita mao ang takna nga kinahanglan kitang mosalig ug modawat kang Jesus nga maoy atong bugtong Manluluwas.

1 Pedro 1:3(MBB) “Magpasalamat kita sa Dios ug Amahan sa atong Ginoong Jesu-Cristo kay tungod sa iyang dakong kaluoy gihatagan kita niya ug bag-ong kinabuhi pinaagi sa pagbanhaw kang Jesu-Cristo.” Ang pag-ingon “**kay tungod sa iyang dakong kaluoy gihatagan kita niya ug bag-ong kinabuhi pinaagi sa pagbanhaw kang Jesu-Cristo.**” Kini nagpasabot nga tungod sa dakong kaluoy sa Dios kanato gihatagan kita niyag paglaom nga maluwas ug kini pinaagi kang Jesus. Si Jesus mao ang gihatag sa Dios timaan nga kita gikaluy-an pag-ayo sa Dios. Mao nga gitawag usab kinig grasya sa Dios. Kay gihatag man niya kini nga walay bayad.

Efeso 2:4-5(MBB) “Apan hilabihan kadako ang kaluoy ug gugma sa Dios alang kanato, (5)nga bisan pa gani sa patay pa kita sa espiritu tungod sa atong pagkadaotan, gibanhaw kita niya uban kang Cristo. Naluwas kamo tungod sa grasya sa Dios.”

Ang bersikulo 4 nag-ingon “**Apan hilabihan kadako ang kaluoy ug gugma sa Dios alang kanato...**” kini dayag kaayo nga nagpasabot kanato nga dako kaayo ang kaluoy ug gugma sa Dios alang sa mga tawo. Kon wala kita kaluy-i sa Dios wala gayod kitay paglaom nga maluwas. Apan kay gikaluy-an man kita sa Dios may paglaom kitang maluwas. Ug ang ebidensya sa iyang dakong kaluoy ug gugma kanato mao si Jesus. Iyang gihatag si Jesus kanato aron kita maluwas kay gikaluy-an ug gihigugma kita niya pag-ayo. Mao nga miingon bersikulo 5 “**nga bisan pa gani sa patay pa kita sa espiritu tungod sa atong pagkadaotan, gibanhaw kita niya uban kang Cristo. Naluwas kamo tungod sa grasya sa Dios.**” Ang pag-ingon “**nga bisan pa gani sa patay pa kita sa espiritu tungod sa atong pagkadaotan, gibanhaw kita niya uban kang Cristo.**” Kini nagpasabot nga bisan sa atong pagkamakasala gihatagan kita niyag paglaom nga maluwas pinaagi ni Cristo nga nagpakamatay alang sa atong mga sala. Busa, sa dihang motoo kita kang Jesus mabanhaw usab kita sama kang Jesus ngadto sa bag-ong kinabuhi. Si Jesus mao ang gihatag sa Dios timaan nga kita gikaluy-an sa Dios. Mao nga gitawag usab kinig grasya sa Dios. Mao nga miingon ang kataposang bahin sa bersikulo 5 “**Naluwas kamo tungod sa grasya sa Dios.**”

Mao nga daghan kaayo kag mabasa sa Biblia nga si Jesus mianhi sa kalibotan aron pagtubos sa mga sala sa tawo. Siya ang gipadala sa Dios aron mapasaylo ang atong mga sala. Gihalad niya ang iyang kaugalingong lawas isip lukat aron mapasaylo ang atong sala.

1 Pedro 2:24 "Didto sa krus gidala ni Cristo diha sa iyang lawas ang tanan tang mga sala aron dili na kita magpakasala kondili magkinabuhi na nga matarong. Pinaagi sa iyang mga samad nangaayo kamo."

Hebreo 10:10 “Tungod kay gituman ni Jesu-Cristo ang buot ipabuhat sa Dios kaniya, nahinloan kitang tanan sa sala pinaagi sa paghalad sa iyang kaugalingong lawas sa makausa lamang ug alang sa tanang panahon.”

Gipadayag 1:5 "Ug gikan kang Jesu-Cristo, ang kasaligang saksi, ang unang gibanhaw nga mao usab ang nagmando sa mga hari sa kalibotan. Gihigugma kita niya ug pinaagi sa iyang dugo giluwag kita niya sa atong mga sala.

1 Timoteo 2:6 "Gitugyan niya ang iyang kaugalingon aron sa paglukat sa tanang tawo. Kini ang kamatuoran nga luwason sa Dios ang tanang mga tawo sa gitagal nga panahon." Kining mga bahina sa Kasulatan nagpasabot gayod kanato nga gihalad ni Cristo ang iyang kaugalingon lawas pinaagi sa kamatayon sa krus aron pagtubos sa atong mga sala isip maoy atong lukat. Siya ang gipadala sa Dios timaan sa iyang paghigugma kanato.

1 Juan 4:9-10 "Gipadayag sa Dios ang iyang gugma kanato pinaagi sa pagpadala sa iyang bugtong Anak nganhi sa kalibotan aron makabaton kita sa kinabuhing walay kataposan pinaagi kaniya. (10)Ang matuod nga gugma mao kini: dili kita maoy unang nahigugma sa Dios kondili siya maoy unang nahigugma kanato. Gipadala niya ang iyang Anak aron pinaagi kaniya mapasaylo ang atong mga sala." Kini nagpasabot kanato nga tungod sa gugma sa Dios alang kanato gipadala niya ang iyang bugtong Anak – si Jesu-Cristo aron kita makabaton ug kinabuhing walay kataposan. Ug pinaagi kaniya mapasaylo ang atong mga sala.

1 Juan 4:14(MBB) "Nakita nato ug gisugilon ngadto sa uban nga gipadala sa Amahan ang iyang Anak aron pagluwas sa kalibotan."

Kini nagpasabot nga ang gipadala sa Amahan aron mahimong Manluluwas sa mga tawo, walay lain mao si Ginoong Jesus, ang Anak sa Dios. Busa ang giila sa Amahan nga manluluwas sa mga tawo mao lamang si Jesus, ang iyang bugtong ug pinanggang Anak. Mao nga daghan kag mabasa sa Biblia nga si Jesus mao ang atong Manluluwas.

Filipos 3:20 "Apan ang atong puloy-anan atua sa langit ug mahinangpon kitang nagpaabot sa pag-anhi sa atong Manunubos gikan sa langit – ang Ginoong Jesu-Cristo."

Ang pag-ingon nga '**si Jesus nga atong Manluluwas**' kini nagpasabot nga ang mga santos mismo sa Biblia sama ni apostol Pablo miila nga ang ilang Manluluwas ug sa tanang tawo mao si Ginoong Jesus. Mao nga kanunay miingon si apostol Pablo sa iyang mga surat '**Si Jesus nga atong Manluluwas**'. Ang mga santos sa Biblia dili sila manluluwas, sila hinoon miingon nga si Jesus ang atong Manluluwas. Kining mga bahina sa Kasulatan nagpamatuod lamang kanato nga ang mga santos mismo sa Biblia walay laing giila nga ilang manluluwas si Jesus lamang. Ang mga santos mismo sa Biblia nagtudlo kanato nga ang manluluwas alang sa mga sala sa mga tawo mao ang atong Ginoong Jesus. Wala sila moingon nga apil silang makaluwas kon mangadgi kita ngadto kanila, kondili sila mismo miingon '**si Jesus mao ang atong Manluluwas.**'

Nan karon, kon si Cristo mao ang gihatag sa Amahan nga maoy Manluluwas sa mga tawo, unsa may atong buhaton ngadto kang Jesus aron kita maluwas? Aron kita maluwas, kinahanglan kitang motuo sa Manluluwas nga mao si Jesus. Kinahanglan kitang modawat ug moila kaniya nga maoy atong Manluluwas. Mao kini ang paagi sa Dios sa pagluwas sa mga tawo. Mao nga sa Biblia daghan kaayo kag mabasa nga nagsulti kanato nga kinahanglan kitang motoo kang Jesus nga maoy atong Manluluwas.

Buhat 16:30-31(MBB) "Unya sila gipagawas niya ug gipangutana, 'Sir, unsa may akong buhaton aron ako maluwas? (31) Sila mitubag, 'Tuo kang Ginoong Jesus, ug maluwas ka lakip ang imong panimalay."

Kini nagpasabot nga ang buhaton sa tawo aron maluwas kinahanglan siyang motoo kang Jesus. Wala sila moingon nga magpamisa ka ug bayrig kwarta aron maluwas ka. Sila miingon hinoon, '**Tuo ni Ginoong Jesus maluwas ka!** Mao usab kini ang giingon ni San Juan nga pinaagi sa pagtoo kang Jesus makabaton kitag kinabuhing dayon.

Juan 3:16, 18 (MBB) "Kay gihigugma pag-ayo sa Dios ang kalibotan ug tungod niini gihatag niya ang iyang bugtong Anak, aron ang tanan nga motuo kaniya dili malaglag kondili makabaton hinuon sa kinabuhing dayon." (18)Ang tanan nga motuo sa Anak dili silotan. Apan kadtong dili motuo kaniya gisilotan na kay wala man siya motuo sa bugtong Anak Dios."

Ang BIBLIA May Tubag

Ang pag-ingon '**Ang tanan nga motuo sa Anak dili silotan**' kini nagpasabot nga dili ma-impiyerno o dili mahiadto sa linaw nga kalayo. Kay ang linaw nga kalayo mao man kini ang dapit nga '**walay kataposang silot**' kay ang kalayo niini wala may pagkapalong. Mao nga ang butahon nato aron dili kita silotan sa Dios mao nga motoo kita sa iyang Anak nga maoy atong Manluluwas. Kay mao kini ang paagi sa Dios aron kita maluwas.

Juan 3:36(ABMBB) "Ang motuo sa Anak may kinabuhing dayon. Apan ang dili motuo sa Anak dili makabaton sa kinabuhing dayon. Magpabilin hinuon kaniya ang kapungot sa Dios hangtod sa kahangtoran."

Kini nagpasabot nga kon kita motoo kang Jesus nga maoy atong Manluluwas makabaton kitag kinabuhing dayon, apan kon dili kita motoo kang Jesus nga maoy atong Manluluwas kay mangita pa kitag laing makatabang sa atong kalag magpabilin ang kapungot sa Dios diha sa atong kinabuhi ug mahiagom gayod kita sa silot sa Dios.

Juan 6:40(MBB) "Kay kini mao ang kabubut-on sa akong Amahan: nga ang tanan nga makakita sa Anak ug motuo kaniya makabaton sa kinabuhing walay kataposan ug banhawon ko sila sa kataposang adlaw." Kini nagpasabot nga ang kabubut-on sa Amahan kon kaluwasan ang hisgotan walay lain kinahanglan motoo kita sa iyang Anak nga si Ginoong Jesus kay siya ang gihatag sa Dios aron kita maluwas.

1 Juan 5:11-13(ABMBB) "Ang pagpamatuod mao kini: ang Dios naghatag kanato sa kinabuhing walay kataposan ug anaa kini sa iyang Anak. (12) Ang midawat sa Anak may kinabuhing walay kataposan. Apan ang wala modawat sa Anak sa Dios wala makabaton sa maong kinabuhi. (13) Gisulatan ko kamong tanan nga nagtuo sa ngalan sa Anak sa Dios aron masayod nga kamo may kinabuhing walay kataposan."

Kini usa ka dayag nga kamatuoran nga ang kinabuhing dayon anaa lamang kang Jesus. Ang tanan nga modawat kaniya, ang tanan nga motoo kaniya ingon nga maoy bugtong niyang Manluluwas may kinabuhing dayon. Mao kini ang giingon ni San Juan.

Roma 3:24-26 (ABMBB) "Apan pinaagi sa grasya nga gigasa sa Dios ngadto kanila, mahimo silang matarong pinaagi kang Cristo Jesus nga nagluwas kanila. (25)Gihatag siya sa Dios aron pinaagi sa iyang dugo mapasaylo ang mga sala sa motuo kaniya. Niining paagiha gipakita sa Dios ang iyang pagkamatarong ug tungod sa iyang pagkamapailubon wala niya tagda ang ilang sala kaniadto. (26) Apan karon gitagad na niya ang mga sala sa mga tawo aron pagpakita nga siya matarong ug himoon niyang matarong ang tanan nga motoo kaniya."

Ang unang bahin sa bersikulo 24 nag-ingon '**Apan pinaagi sa grasya nga gigasa sa Dios ngadto kanila**' kini nagpasabot nga si Jesus mao ang grasya nga gigasa sa Dios ngadto sa katawhan. Ug ang tanan nga motoo kaniya mapasaylo ang ilang mga sala. Busa, ang tanan nga motoo kaniya himoong matarong sa Dios. Mao nga miingon ang Efeso 2:8-9 kay pinaag sa pagtoo naluwas kamo tungod sa grasya sa Dios.

Efeso 2:8-9(MBB) "Kay pinaagi sa pagtoo naluwas kamo tungod sa grasya sa Dios. Dili kini inyong buhat kondili gasa kini sa Dios. (9)Busa walay makapasigarbo niini sanglit dili man kini bunga sa inyong mga paningkamot."

Efeso 2:8-9(AB) "Kay tungod sa grasya kamo nangaluwas pinaagi sa pagtoo; ug kini dili sa inyong kahimoan, kini hatag sa Dios – (9)dili tungod sa mga binuhatan aron walay bisan kinsa nga magapasigarbo."

Ang bersikulo 8 nag-ingon "**Kay pinaagi sa pagtoo naluwas kamo tungod sa grasya sa Dios. Dili kini inyong buhat kondili gasa kini sa Dios.**" Kini dayag kaayo nga nagpasabot kanato nga ang kaluwasan **gasa sa Dios**, ang kaluwasan **hatag sa Dios**. Ang atong parte mao ang pagdawat sa **gasa sa Dios** pinaagi sa pagtoo. Kinahanglan kitang motoo sa gasa sa Dios alang sa atong kaluwasan. Ang pag-ingon nga "**naluwas kamo tungod sa grasya sa Dios.**" Ang pulong "**grasya sa Dios**" kini nagpasabot nga may gihatag ang Dios alang kanato nga walay bayad. May gihatag ang Dios kanato isip

Ang BIBLIA May Tubag

nga kita iyang gikaluy-an. Mao na nga gitawag kinig grasya. Gihatagan kita sa Dios sa maong butang nga dili unta kita takos nga hatagan. Mao kini ang gipasabot sa pulong **grasya sa Dios**. Usa ka pabor nga gihatag sa Dios nga dili unta kita takos nga hatagan, apan gihatag gayod sa Dios. Ug ang gihatag sa Dios alang sa mga tawo aron makabatog kaluwasan mao ang iyang bugtong Anak nga si Jesu-Cristo. Siya ang gasa Dios alang kanato aron kita maluwas. Ang atong parte mao ang pagtoo sa gasa sa Dios nga mao si Cristo Jesus. Kinahanglan motoo kita kang Jesus nga siya ang gasa sa Dios alang sa atong kaluwasan. Kinahanglan motoo kita kang Jesus nga siya ang gihatag sa Dios aron mapasaylo ang atong mga sala. Kinahanglan motoo kita nga ang kaluwasan pinaagi lamang kang Jesus. Kinahanglan motoo kita nga ang kapasayloan sa sala pinaagi lamang kang Jesus. Mao kini ang gipasabot sa bersikulo 8 nga nag-ingon **“Kay pinaagi sa pagtoo naluwas kamo tungod sa grasya sa Dios. Dili kini inyong buhat kondili gasa kini sa Dios.** Kini dayag nga nagpasabot kanato nga ang kaluwasan dili atong paningkamot. Kay kon maluwas pa ang tawo pinaagi sa iyang kaugalingong paningkamot, nan, dili nalang unta ipadala sa Dios ang iyang bugtong Anak aron pagluwas kanato kay pwede man diay nga maluwas ang tawo pinaagi sa iyang kaugalingong paningkamot. Apan dayag kaayo nga nagsulti kanato ang Biblia nga ang kaluwasan gasa sa Dios. Ang kaluwasan hatag sa Dios. Bisan unsaon pa natog paningkamot aron maluwas kon wala si Cristo magpakamatay sa krus alang kanato walay kapasayloan ang atong mga sala. Nagpasabot nga ang kaluwasan gasa sa Dios dili kini bunga sa atong paningkamot.

Mao kini ang gipasabot ni apostol Pablo sa iyang pag-ingon **“Kay pinaagi sa pagtoo naluwas kamo tungod sa grasya sa Dios. Dili kini inyong buhat kondili gasa kini sa Dios. (9)Busa walay makapasigarbo niini sanglit dili man kini bunga sa inyong mga paningkamot.”** Kini dayag kaayo nga nagpasabot kanato nga ang kaluwasan dili bunga sa atong paningkamot. Ang atong parte sa kaluwasan mao nga kinahanglan kitang motoo sa gasa sa Dios alang sa atong kaluwasan nga mao si Cristo-Jesus. Siya ang grasya sa Dios, siya ang gihatag sa Dios aron kita maluwas. Ug ang paagi sa Dios aron kita maluwas kinahanglan motoo kita sa iyang Anak – Si Cristo Jesus.

Kini nagpasabot nga ang kaluwasan gasa sa Dios ug ato kining mabatonan kon motoo kita kang Ginoong Jesus nga mao ang gigasa sa Dios alang kanato. Kinahanglan motoo kita nga igo na ang iyang gihimo sa krus alang kanato. Wala na kinahanglana ang daghan pang ceremonyas nga binayrag kwarta aron konuhay ang sala mapasaylo. Igo na ang gibuhat si Jesus. Tuohi siya nga ang iyang gibuhat sa krus, ang iyang kamatayon sa krus igo nang moluwas nimo kon motoo ka kaniya sa kinasingsing gayod.

Apan tingali moingon ka **'Ikaw ra ba diay ang mitoo kang Jesus', Kamo ra ba diay ang mitoo kang Jesus, mitoo man sad mi kang Jesus, di pareho ra ta!** Mga kaigsoonan, kon tinuod nga mitoo ka kang Jesus nga maoy imong Manluluwas, mangutana ko nimo. Pila man gayod ang imong gitooan nga makatabang sa imong kalag aron maluwas? Si Jesus ra ba o naa pay lain? Be honest! Kon ikaw 'honest' gayod sa imong kaugalingon dili kay si Jesus ra ang imong gitooan nga makatabang sa imong kalag, kondili duna pay daghan nga imong gitooan nga mao ang mga santos. Mao bitaw nga mag-ampo ka ngadto sa mga santos o mangadgi ka ngadto sa mga santos kay nagtoo ka man nga makatabang sad sila alang sa imong kaluwasan. Kini nagpasabot lamang nga ang imong pagtoo kang Jesus lahi sa pagtoo nga gitudlo sa Biblia kay nagtudlo ang Biblia nga motoo kita kang Jesus nga maoy atong bugtong Manluluwas ug wala na gayoy lain. Ug mao kini ang matang sa pagtoo nga gipasabot sa Biblia, nga motoo kita kang Jesus nga siya lamang ang makaluwas kanato. Dili kay daghan kapag pangadgian, kay kon daghan kapag pangadgian aron kunohay makatabang sa imong kalag o sa imong kaluwasan nagpasabot lamang kini nga wala kay salig ni Jesus, nakaminos ka ni Jesus. Ug labaw sa tanan, wala kay mabasa sa Biblia nga ang mga santos kinahanglan pangadgian. Ang mga santos mismo sa Biblia nagtudlo kanato nga kinahanglan nga walay laing ngalan nga atong toohan aron kita maluwas. Mao lamang ang ngalan ni Ginoong Jesus.

Buhat 4:12(ABMBB) "Ang kaluwasan makaplagn lamang diha kaniya kay dinhi sa kalibotan wala nay laing ngalan nga gihatag sa Dios ngadto sa katawhan nga maoy makaluwas kanato." Kining Buhat 4:12 si apostol Pedro mismo maoy nagsulti niini. Matud niya **"Wala nay laing ngalan nga gihatag sa Dios ngadto sa katawhan nga maoy makaluwas kanato."** Kini nagpasabot nga wala nay laing ngalan nga angay nimong toohan aron ka maluwas. Kini mao ang ngalan ni Jesus kay wala nay laing ngalan nga gihatag sa Dios ngadto sa katawhan nga maoy makaluwas kanato. Kini dayag kaayo nga nagpasabot kanato nga walay labot ang mga santos sa imong kaluwasan ni makatabang sa imong kaluwasan. Sila nagsulti kong gusto kang maluwas si Jesus lang ang angay nimong toohan kay siya lamang ang dalan paingon sa Amahan.

Juan 14:6(AB) "Si Jesus mitubag kaniya, 'Ako ang dalan, ug ang kamatuoran, ug ang kinabuhi; walay bisan kinsa nga makaadto sa Amahan, gawas kon pinaagi kanako." Kon gusto kang maluwas si Jesus ang dalan. Wala moingon si Jesus nga usa siya sa mga dalan kondili miingon si Jesus 'Ako ang dalan walay makadto sa Amahan (nagpasabot sa langit diin nagpuyo ang Amahan) kondili moagi kaniya.

Juan 10:7,9(ABMBB) "Busa miingon si Jesus pag-usab, 'Sultihan ko kamo: ako ang pultahan sa mga karnero...(9)Ako ang pultahan. Ang mosulod agi kanako maluwas. Makasulod-gawas siya ug makakaplag siyag masibsib."

Kini nagpasabot gayod kanato nga kon gusto kitang maluwas kinahanglan kitang mosulod sa pultahan nga mao si Jesus. Ang mga santos dili sila maluwas, ni makatabang sa imong kaluwasan kay dila man sila manluluwas. Busa kon gusto kitang maluwas kinahanglan kitang motoo sa manluluwas nga gipadala sa Amahan nga mao si Jesus. Kay mao kini ang paagi sa Dios aron kita maluwas. Mao nga nag-ingon sa apostol Pablo ang tanan nga motoo Jesus dili gayod magmahay.

Roma 10:9-11(ABMBB) "Maluwas ka kon ipahayag mo nga si Jesus mao ang Ginoo, ug sa kinasingkasing motoo ka nga gibanhaw siya sa Dios. (10)Gihimo kitang matarong sa Dios kay nagtuo man kita sa kinasingkasing gayod ug maluwas kita kay gipahayag man nato kini. (11) Kay ang Kasulatan nag-ingon, 'Ang nagtuo kaniya dili gayod magmahay."

Ang unang bahin sa bersikulo 9 nag-ingon **"Maluwas ka kon ipahayag mo nga si Jesus mao ang Ginoo..."** Ang pag-ingon nga **"Maluwas ka kon ipahayag mo nga si Jesus ang Ginoo"** kini nagpasabot nga himoon nimo si Jesus nga master sa imong kinabuhi. Tigdumala sa imong kinabuhi. Ang iyang kabubut-on maoy imong sundon dili ang imong gusto. Ang iyang pagtulun-an maoy imong sundon dili nang imong namat-an nga wala niya itudlo. Palabihon nimo siya labaw sa tanang butang. Mao nay paghimo ni Cristo nga Ginoo sa atong kinabuhi. Mao nga miingon gayod ang bersiluo 9 **"Maluwas ka kon ipahayag mo nga si Jesus mao ang Ginoo, ug sa kinasingkasing motoo ka nga gibanhaw siya sa Dios."** Kini nagpasabot gayod kanato nga kinahanglan gayod kitang motoo kang Jesus nga siya ang Ginoo sa atong kinabuhi. Ug kinahanglan nga motoo kita kaniya sa kinasingkasing gayod. Kon imo kining himoon dili gayod ka magmahay. Mao kini ang giingon sa bersikulo 11 nag-ingon **"Kay ang Kasulatan nag-ingon, 'Ang nagtuo kaniya dili gayod magmahay."** Pero kon duna ka pay laing gipangtoohan nga makatabang kunahay sa imong kaluwasan sama sa mga santos magmahay ka ra gayod sa katapusan. Busa, aron dili ka magmahay sa katapusan gisultihan ka sa Biblia daan nga ang nagtuo kang Jesus dili gayod magmahay. Tuohi sa kinasingkasing gayod ang gihatag sa Dios alang sa atong kaluwasan nga mao si Jesus. Kini nagpasabot nga ang kaluwasan gasa sa Dios ug ato kining mabatonan kon motoo kita kang Ginoong Jesus nga mao ang gihatag sa Dios alang kanato. Kinahanglan motoo kita nga igo na ang iyang gihimo sa krus alang kanato. Wala na kinahanglana ang daghan pang ceremonyas nga binayrag kwarta aron konuhay ang sala mapasaylo. Igo na si Jesus. Tuohi siya nga ang iyang gibuhay sa krus, ang iyang kamatayon sa krus, igo nang maluwas kanimo kon motoo ka kaniya sa kinasingkasing gayod. Mao kini ang paagi sa kaluwasan aron kita maluwas. Mao kini giingon sa Biblia.